

求恕齋
叢書

王荊公年譜

二

王荆國文公年譜卷下

錫山顧棟高輯

吳興劉承幹校

熙寧七年甲寅公年五十六歲

三月丙辰遼遣林牙蕭禧來言河東疆界事

己未行方田法

夏四月乙酉王韶擊木征降之

丙戌公去位以觀文殿大學士知江寧府

薦韓絳同平章事呂惠卿參知政事時呂嘉問張
諤持公而泣公勞之曰吾已薦惠卿矣鄭俠又上

書言安石本爲惠卿所誤至此今復扳援以遂前
非不復爲宗社計又上疏諫用兵語甚切屬熙河
奏捷殺戮甚眾上爲惻然手詔諭王韶等今後只
務招降木征餘黨毋以多殺爲功於是惠卿等惡
之

公旣薦惠卿執政復以啟賀云王功方就庶無一
簣之虧國勢已安更加九鼎之重豈徒惠好過示
撝謙冀同雅操之堅以稱茂恩之厚如此推心委
任而惠卿轉眼卽背之得不念溫公之言而生媿

耶

公與王子醇書云方今熙河所急在修守備嚴戒
諸將勿輕舉動武人多欲以討殺取功爲事誠如
此而不禁則一方憂未艾也公厚以恩信撫屬羌
察其材者收之爲用誠能如此則非特無內患亦
宜賴其力以乘外寇矣自古以好坑殺人致叛以
能撫養收其用皆公所覽見且王師以仁義爲本
豈宜以多殺斂怨耶又聞屬羌經討者旣無蓄積
又廢耕作後無以自存安得不屯聚爲寇以梗商
旅往來如募之力役及伐材之類因以活之宜有
可爲幸留意

王荊公罷相出鎮金陵時飛蝗自北而南江東諸郡
皆有之百官餞荊公於城北劉貢甫後至追之不
及見其行榻上有一書屏因書一絕以寄之云青
苗助役兩妨農天下噭噭怨相公惟有蝗蟲偏感
德又隨車騎過江東

韓獻肅絳之入相繼荊公之後政事有未便者公將
更易振舉之奏古者冢宰制國用今天下財用出
入宰相乃不與聞始置局中書稽考天下財用之
數量入以爲出援用司馬光上曰吾於光豈有所
愛顧光未肯來耳行狀

六月十五日到江寧府任

謝表云精力耗於事爲之眾罪戾積於歲月之多
雖恃含垢之寬終懷覆餗之懼復與王子醇書云
木征內附熙河無復可虞惟當理冗費爲經久之
計上以公功信積著虛懷委任非復議論所能搖
沮某久曠職事加以疲病不能自持幸蒙恩憐得
釋重負然相去彌遠不勝惓惓

初到江寧作詩云江湖歸不及花時空繞扶疏綠玉
枝夜直去年看蓓蕾晝眠今日對紛披

寄吳氏女子詩云伯姬不見我乃今始七齡蓋公自

熙寧元年夏四月到京師至今歷七年矣

公長女
爲吳充

子婦吳安
持之妻

公弟安國以鄭俠獄放歸田里

呂惠卿構之也時俠以上書送汀州編管旣行上問惠卿曰鄭俠小臣何緣知禁中事及大臣奏對之語惠卿曰此皆馮京手錄令王安國持示導之使言爾上以責京京奏俠行未遠乞追還對辨遂付詔獄遇安國於途安國舉鞭相賀曰賢可謂獨立不懼因隨至所居求觀前後奏俠答以未嘗留存安國言亦見賢所與家兄書家兄雖安國之言

不聽況公乎俠曰不意丞相一旦爲小人所誤以
至於此安國曰是何爲小人所誤家兄自以爲人
臣子不當避四海九州之怨使怨歸於己方是臣
子盡忠國家俠曰未聞堯舜在上夔契在下而有
四海九州之怨安國以爲然因赴對成獄俠送英
州編管安國放歸田里安國嘗以佞人目惠卿故
惠卿銜之嘗諫其兄以天下洶洶不樂新法恐爲
家禍介甫不聽安國哭於影堂曰吾家滅門又嘗
責曾布以誤惑丞相更變法令布曰足下人之子
弟朝廷變法何預足下事安國怒曰丞相吾兄也

丞相之父卽吾父也丞相由汝之故殺身破家僇及先人發掘丘壟豈得不干預我事耶

言行錄記聞

八月十七日公弟祕閣校理安國平甫卒

時惠卿有射羿之意公罷相遂因鄭俠事陷安國坐奪官放歸詔以諭公公對使者泣下旣而復其官命下而安國卒矣年四十

見公所撰墓志乃綱目通鑑俱載八年正月爲呂惠卿所搆罷蓋年月誤也公有中使撫慰安國弟亡謝表云臣辭恩機要藏疾里閭蓋正當七年罷免之時若八年二月則已再入相平甫

不應正月尙列朝籍也

王平甫熙寧中直宿崇文館夢有人挾至海上見海中夾宮殿甚盛其中作樂笙簫鼓吹之伎甚眾榜其宮曰靈芝宮平甫欲與俱往有人在宮側謂曰時未至且令去他日當迎之至此恍然夢覺時禁中已鳴鐘矣平甫爲詩記之曰萬頃波濤木葉飛笙歌宮殿號靈芝揮毫不似人間世長樂鐘聲夢覺時後四年平甫卒其家卜之曰公嘗夢往靈芝宮果然乎卜曰然又三年曾阜夢與平甫會旁一人曰平甫已列仙官矣

九月癸丑置京畿河北京東西路三十七將

十一月己未祀天地於圜丘大赦時呂惠卿已畔公
慮公復進用乃援郊祀赦例薦公爲節度使上詰
曰王安石去不以罪何故用赦復官惠卿無以對
八年乙卯公年五十七歲

春二月癸酉復起公同平章事

時呂惠卿得志慮公復用欲逆閉其途凡可以下
石者無不爲一時朝士更朋附之於是鄧綰鄧潤
甫因李逢之獄又挾李士寧以撼公韓絳顓處中
書度不能制密請帝復召公爲相帝從之惠卿懼

乃條列公兄弟之失數事面奏冀上意沮上悉封
以示公公上表有云忠不足以取信而事事至於
自明義不足以勝姦而人人與之立敵蓋爲惠卿
發也旣承召命卽倍道而進七日至汴李士寧者
蜀人得導氣養生之術自言時已三百歲又預知
人休咎公嘗與之詩及爲相每延於東府跡甚熟
暨公鎮金陵而惠卿參大政會山東告李逢劉育
之變事連宗子趙世居御史府沂州各起獄推治
之劾言士寧嘗與此謀詔捕之獄世居賜死李逢
劉育磔於市士寧決杖流永州連坐者甚眾惠卿

因欲引士寧以誣鑛公會公再入秉政謀遂不行

公集中有贈李士寧道人詩云杳杳人傳多異事冥冥誰識此高風蓋公好奇故此輩得以詭誘使非再相則大獄成矣

乙酉初行河北戶馬法

六月上三經新義詔頒于學宮

有序見集中

加公尙書左僕射兼門下侍郎昭文館大學士子
雱龍圖閣直學士呂惠卿給事中雱辭新命惠卿
勸帝許之用是益成仇隙

荆公經義行舉子專誦王氏章句而不解義公嘗
歎日本欲變學究爲秀才不謂變秀才爲學究也

安石與其子雱其徒呂惠卿升卿撰定詩書周禮
義模印頒天下凡士子應試者自一語以上非新
義不得用於是舉者不復思索經義亦不復誦正
經惟誦安石惠卿書精熟者輒得上第又多以佛
書證六經至全用天竺語以相高晚向字學復以
字書去取天下士於是學者不復解經而專解字
往往辨析字畫說一字至數百言去經義益遠

秋七月議割地畀遼

先是遼屢遣使蕭禧等來爭議疆事不決帝以問
公公曰將欲取之必姑與之乃詔以分水嶺爲界

遣韓縝如河東割新疆以畀之東西凡失地七百里

九月公兼修國史

冬十月呂惠卿出知陳州

御史蔡承禧論惠卿欺君玩法植黨肆奸鄧綰亦欲彌縫前附惠卿之跡以媚公公子雱尤深憾遂諷綰奏惠卿兄弟强借秀州華亭富民錢五百萬與知華亭縣張若濟買田共爲姦利事置獄鞫之惠卿竟罷出知陳州

公屬疾不視事帝強起之

時彗出軫帝避殿減膳詔求直言詢政事之未協
於民者公上疏言晉武帝五年彗出軫十年又有
孛而其在位二十八年天道遠但當修人事以應
之願勿以爲憂帝曰聞民間甚苦新法公曰祁寒
暑雨民猶怨咨此無庸恤帝曰豈若并祁寒暑雨
之怨亦無耶公退而屬疾臥帝慰勉乃起視事因
取上所不喜者章惇趙子幾等悉奏擢用上喜其
出勉從其言由是權益重

經略交趾

時獻言者謂交趾已爲占城所敗眾不滿萬可計

日以取乃以沈起知桂州繼又以劉彝代之相繼
經畫

九年丙辰公年五十八歲

公任平章政事

春二月以郭逵爲安南招討使

時交趾大舉入寇連陷欽廉州謀得交趾露布言
中國作青苗助役法窮困生民我今出兵欲相拯
濟公大怒自草敕榜詆之以趙高爲招討使高言
郭逵老於邊事願以爲使而已副之

秋七月公子雱卒